

SPORTCHILARNI BAXTSIZ HODISALARDAN EHTIYOT SHART SUG'URTA QILISH MUHIM SHARTLARI

I. SUG'URTA HODISASI

1.1. Quyidagi hodisalar Sug'urta hodisalari hisoblanadi:

- a) Sug'urtalangan shaxsning sport musobaqalari yoki mashg'ulotlar o'tayotgan paytda baxtsiz hodisa tufayli jarohatlanishi;
- b) Sug'urtalangan shaxsning sport musobaqalari yoki mashg'ulotlar o'tayotgan paytda baxtsiz hodisa tufayli o'limi;
- d) a - kichik bandda ko'zda tutilgan sug'urta hodisalari ro'y berganda sug'urta pulini to'lash to'g'risidagi qaror davolash muassasasining xujjatlari asosida qabul qilinadi.

1.2. Baxtsiz hodisaga - Sug'urtalangan shaxsni hohish irodasiga bog'liq bo'lmagan holda ularning tanasi jarohatlanishiga, tana a'zolarini ishlash funksiyasini o'zgarishiga yoki o'limiga olib keluvchi tabiatda bo'ladigan hodisalar natijasida kelib chiqqan shikastlanish (mayiblanish)lar yoki o'lim hisoblanadi, jumladan: kuyish, muzlab qolish, cho'kish, (shamollash va kasallik tufayli vafot etishdan tashqari), elektr toki va yashin urishi, tabiat hodisalari (tezligi 20 m/s dan yuqori bo'lgan kuchli shamol, juda kuchli shamol (dovul), juda kuchli jala, sel va sel oqimi, yashin urishi, zilzila, toshqin, ko'chki, do'l, juda kuchli qor yog'ishi), portlash hamda hayvonlar tajovuzi, tishlashi natijasida shikastlanishlar, g'araz niyatli shaxsni hujumi, Sug'urtalangan shaxsning yiqilishi yoki ustiga biror bir jismni tushib ketishi, jismning urilishi, transport vositalarining (avtomobil, poyezd, tramvay va boshqalarni) ag'darilishi yoki ularning harakati vaqtida yo'l transport hodisalarida, mashina, mexanizmlardan va boshqa turdagi asboblardan foydalanayotganda olingan jarohatlar, tasodifan nafas olish yo'liga biror narsa tiqilib qolishi, kimyoviy moddalar ta'sirida kuchli zaharlanish, tasodifan suyak sinishi, chiqishi, bo'g'im va to'qimalarning uzilishi, tana a'zolarining to'liq yoki qisman yo'qotilishi, tish sinishi, noto'g'ri tibbiy manupulyatsiya natijasida a'zolarining uzilishi (jarohatlanishi, vafot etishi).

1.3. Sug'urtalangan shaxsga baxtsiz hodisa tufayli shikastlanishi (mayib bo'lishi)ga to'lanadigan Sug'urta puli miqdori Jamiyat Boshqaruvi tomonidan tasdiqlangan "Baxtsiz hodisalardan ehtiyot shart sug'urta qilishning barcha turlaridan sug'urta hodisasi natijasida tan jarohati olishi bo'yicha sug'urta puli miqdorini aniqlash jadvali"ga binoan davolash muassasasining hujjatlari asosida, shikastlanishni turiga qarab, Sug'urta pulidan shikastlanish darajasi foizi hisobida aniqlanadi.

1.4. Sug'urtalangan shaxs vafot etganda Manfaatdor shaxsga yoki Sug'urtalangan shaxsning vorislariga Sug'urta puli to'liq to'lanadi. Sug'urtalangan shaxs o'limi tufayli to'lanadigan sug'urta pulidan baxtsiz hodisa tufayli shikastlanishi (mayib bo'lishi)ga ilgari to'langan to'lov chegirib qolinadi.

II. SUG'URTA HODISASI HISOBLANMAYDI

2.1. Quyidagilar natijasida yuzaga kelgan holatlar Sug'urta hodisasi hisoblanmaydi:

- a) barcha hildagi o'tkir surunkali va nasliy kasalliklar (shu jumladan infarkt, insult va to'satdan a'zolari kasallanishi, kasallikni nasldan naslga o'tish natijasida uni rivojlanishi), anafilaktik shok va oziq - ovqat toksikoinfeksiyasi (salmonellez, ichburug' va boshqalar);
- b) Sug'urtalangan shaxsning qasddan sodir etgan va sug'urta hodisasiga sabab bo'lgan jinoyati tergov yoki sud tashkilotlari tomonidan qasddan sodir etilgan deb topilsa;
- d) Sug'urtalan shaxs tomonidan transport vositasini alkogol, narkotik, toksik sarxushlik vaqtida boshqarishi yoki transport vositasini boshqarishni shunday sarxushlik holatidagi kishiga yoki transport vositasini boshqarish huquqiga ega bo'lmagan kishiga topshirishi;
- e) Sug'urtalangan shaxsning o'ziga-o'zi qasddan yetkazgan tan jarohati;
- f) yadro portlashi, radiatsiya va radiaktiv nurlanish, zaharlanish ta'sirida, harbiy harakatlar, harbiy mashqlar, fuqarolar urushi, ish tashlash, halq ko'tarilishini har hil turlari oqibatida olingan tan jarohatlari yoki o'lim.

III. SUG'URTA PULINI OLISH UCHUN TAQDIM QILINADIGAN HUJJATLAR

3.1. Sug'urta qildiruvchi/Sug'urtalangan shaxsning Sug'urta shartnomasida ko'zda tutilgan baxtsiz hodisalar natijasida sog'lig'iga zarar yetkazilganligi to'g'risida Sug'urtalovchiga 30 (o'ttiz) kun ichida xabar qilishi lozim.

3.2. Sug'urta qildiruvchi/Sug'urtalangan shaxs Sug'urtalovchiga murojaatida quyidagi ma'lumotlarni ko'rsatishi shart:

-Sug'urta hodisasi bo'yicha Sug'urta puli/ta'minotini olish uchun ariza (arizada musobaqa tashkilotchisining yoki mashg'ulot murabbiyining voqe'ani tavsiflovchi yozuvi, imzosi va kontaktlari bo'lishi shart);

-Sug'urta polisi;

-Shaxsni tasdiqlovchi xujjat;

-Sug'urta hodisasi yuz berganligini tasdiqlovchi davolash muassasasining ma'lumotnomasi.

3.3. Sug'urta shartnomasi (Sug'urta polisi)da ko'rsatilgan baxtsiz hodisalar natijasida vafot etganda:

-Manfaatdor shaxs (voris)ning arizasi;

-Sug'urta polisi;

-FXDYO bo'limidan O'lim to'g'risidagi guvohnoma yoki uning notarial idora tomonidan tasdiqlangan nusxasi;

-Vorislik huquqi to'g'risida notarial idora tomonidan tasdiqlangan guvohnoma nusxasi;

-Sug'urta qildiruvchining/vorisning shaxsini tasdiqlovchi hujjat.

Taqdim qilingan hujjatlar sug'urta pulini to'lash bo'yicha qaror qabul qilishga imkon bermagan hollarda Sug'urtalovchi yakuniy hulosani qabul qilish uchun zarur qo'shimcha (rentgen surati, tergov tashkilotlarining hujjatlari va boshqa) hujjatlarni so'rash huquqiga ega.

IV. TO'LOV MUDDATI

4.1. Sug'urta qildiruvchi tomonidan sug'urta hodisasi bilan bog'liq bo'lgan barcha ma'lumotlar va hujjatlarni to'liq taqdim qilingandan keyin, Komissiya tomonidan hujjatlar o'rganib chiqiladi va 15 kun ichida sug'urta hodisasi yuz berganligi yoki yo'qligi to'g'risida dalolatnomani tuziladi. Sug'urta hodisasi yuz berganligi aniq bo'lsa, komissiya sug'urta puli miqdorini aniqlaydi hamda hodisa tan olinganligi haqida tuzilgan dalolatnomada aks ettiradi.

4.2. Sug'urta puli/ta'minoti dalolatnoma imzolangan kundan 5 bank kuni ichida Sug'urta qildiruvchi/Sug'urtalangan shaxsning bankdagi omonat daftarchasiga yoki plastik kartochka hisob raqamiga uning yozma arizasiga binoan pul o'tkazish yo'li bilan to'lanadi.

4.3. Sug'urta qildiruvchining shartnomani (polisni) bekor qilish bo'yicha yozma murojaatiga ko'ra, Sug'urtalovchi Sug'urta qildiruvchiga shartnomaning o'tmagan muddatiga mutanosib ravishda sug'urta mukofotlari qaytarib beriladi. Bunda Sug'urtalovchining sug'urta ishini yuritish bilan bog'liq bo'lgan sug'urta mukofotining 25 foizi miqdoridagi xarajatlari qaytariladigan sug'urta mukofotidan chegirilib qolinadi.

V. TOMONLARNING HUQUQ VA MAJBURIYATLARI

5.1. Sug'urta qildiruvchi (Sug'urtalangan shaxs) huquqlari:

a) Sug'urta qildiruvchi Sug'urtalovchidan Sug'urta shartnomasining amal qilish davrida sug'urtaga doir maslahatlar olish;

b) Sug'urta hodisasi yuz berganda uning foydasiga tuzilgan Sug'urta shartnomasi bo'yicha Sug'urtalovchi tomonidan qabul qilingan majburiyatlarni bajarilishini talab qilish;

d) Sug'urta shartnomasini muddatidan oldin bekor qilish uchun Sug'urtalovchiga ariza bilan murojaat qilish.

5.2. Sug'urta qildiruvchi (Sug'urtalangan shaxs) majburiyatlari:

a) Sug'urta shartnomasi tuzilayotganda Sug'urta qildiruvchi o'ziga ma'lum bo'lib, Sug'urta hodisasi yuz berishi ehtimolini va uning yuz berishi tufayli kutilajak zarar miqdori (Sug'urta havfi)ni aniqlash uchun muhim ahamiyatga ega bo'lgan holatlar to'g'risidagi ma'lumotlarni Sug'urtalovchiga xabar qilish;

b) Sug'urta qildiruvchi (Sug'urtalangan shaxs) Sug'urta mukofotini Sug'urta shartnomasida belgilangan muddatda to'lash;

d) Sug'urta qildiruvchi shartnoma tuzilayotganda Sug'urtalovchiga ma'lum qilingan holatlarda yuz bergan, o'ziga ma'lum bo'lgan muhim o'zgarishlar to'g'risida, Sug'urta shartnomasining amal qilish

davrida bu o'zgarishlar Sug'urta havfi ortishiga jiddiy ta'sir ko'rsatishi mumkin bo'lsa, Sug'urtalovchiga darhol xabar qilish;

e) Sug'urta qildiruvchi (Sug'urtalangan shaxs) Sug'urta shartnomasi bo'yicha Sug'urta hodisasi yuz berganda, Sug'urta hodisasi sodir bo'lgan vaqtdan 30 (o'ttiz) kundan kechikmay Sug'urtalovchini yoki uning Sug'urta agentini yozma ravishda xabardor qilish;

f) Zarur hollarda Sug'urtalovchiga qarashli shifokor-ekspertga jabrlangan Sug'urtalangan shaxsning sog'lig'ini holati va kasallik tarixini o'rganish uchun ruxsat berish.

5.3. Sug'urtalovchining huquqlari:

a) Sug'urta qildiruvchi (Sug'urtalangan shaxs) Sug'urta shartnomasi tuzilgandan so'ng Sug'urtalovchiga bila turib (sog'liq va sug'urta xavfiga oid) yolg'on ma'lumotlar berganligi aniqlansa, Sug'urtalovchi shartnomani haqiqiy emas deb topish;

b) Sug'urta shartnomasi tuzilayotganda Sug'urtalovchi Sug'urta qildiruvchi sog'lig'ining haqiqiy holatini aniqlash uchun uni tekshirtirish;

d) zarur hollarda vakolatli tashkilotlardan qo'shimcha ma'lumotlar olish;

e) Sug'urtalovchi o'ziga qarashli shifokor-ekspertni jabrlangan Sug'urta qildiruvchi (Sug'urtalangan shaxs)ning sog'lig'ini holati va kasallik tarixini o'rganish uchun yuborish;

f) Sug'urtalovchi Sug'urta hodisasi yuzaga kelishida aybdor shaxslarga nisbatan to'langan pulni undirish uchun sudda da'vo qo'zg'atish.

5.4. Sug'urtalovchining majburiyatlari:

a) Sug'urta qildiruvchi (Sug'urtalangan shaxs)ni sug'urta Qoidalari bilan tanishtirish;

b) Sug'urta qildiruvchiga (Sug'urtalangan shaxs)ga Sug'urta mukofoti to'langandan so'ng elektron sug'urta polisi rasmiylashtirib berish;

d) Sug'urta hodisasi ro'y berganda Sug'urta qildiruvchiga (vorislariga) sug'urta Qoidalarida belgilangan muddatda va tartibda Sug'urta pulini amalga oshirish;

e) Sug'urta puli to'lovi rad etilganda, Sug'urta qildiruvchiga yozma ravishda xabar qilish;

f) Sug'urta qildiruvchiga Sug'urta shartnomasi muddati davomida sug'urtaga oid maslahatlar berish.